

**GOSOS**  
**PER LA**  
**Settimana**  
**Santa**



Tipografia Ortobene - Nuoro

---

# B. V. ADDOLORATA

## (SETTENARIO)

---

### COMMIATO DI GESÙ ALLA MADRE

#### Gesù

*Su partire m' est forzadu  
E fagher de te ausenzia  
O Mamma dani lassenzia  
Ch' ando a morre inclavadu*

1. - De fagher sobbedienza  
Su tempus est cuntempladu  
Segund' est determinadu  
Dae s' alta Onnipotenzia,  
Mamma tene passienza,  
Già chi gasi est ordinadu

2. - O Mamma isconsolada  
Non potto a custu faltare  
Faghe de t' accunortare  
De sa presente zornada  
S' ora est già arrivada  
A su chi est determinu.

3. - Adam peccat mandighende  
Eo, lu pago morinde,  
Adam peccat divertinde  
Eo lu pago penende,  
Adam sa frutta gosende  
Eo in s' alvore inclavadu.

#### Maria

*Già chi non potto negare  
Fizu, su chi mi demandas  
Eo benzo si tue andas  
A morrer ambos impare*

1. - Fizu de s' anima mia  
Non lu potto cunsentire,  
Si non pro ti sighire  
Faghindedi cumpagnia  
Pianghende peri sa jia  
Senza mai ti lassare.

2. - Fizu in sa mezus edade  
Cheres morrer cun prestesa,  
Dilatadu a sa bezzesa  
Si de me has piedade,  
Mira sa penalidade  
Chi mi dêt accompagnare.

3. - Repara amante pastore  
In cuss' edade fiorida,  
E non intreghes sa vida  
A su iudaicu furore,  
Però isco chi s' amore  
Non ti lasset riposare.

4. - Beneditta sias cantu  
Podet cuddu Eternu Re  
Beneditta dae me  
E de su Spiritu Santu  
De cuddu celesti mantu  
Tenzas consolu sobradu.

5. - Adios Mamma attristada,  
Adios, Mamma affligida,  
De dolores aggredida  
De tormentos circundada,  
Pro amparu destinada  
De su meu apostoladu.

6. - Restade dispensadora  
De sa grazia celestiale,  
Ca de su transe mortale  
Mi est arribada s' ora,  
Tenes de bier ancora  
Su corpus meu interrada.

4. - Benedittu, o Fizu amadu,  
Cuddu Padre chi t' imbiat,  
E benedittu ti siat  
Su latte chi ti happe dadu,  
Samben ch' happe ministradu  
In carre pro t' ingendrare.

5. - Adios, Fizu amorusu,  
Adios, fizu disigiadu,  
Fizu chi a mamma hat lassadu  
In turmentu rigorosu,  
Breves annos de riposu  
Mi dat eternu passare.

6. - O mammas isconsoladas  
Sa chi hazis perdudu fizo  
Cuntemplade sos fastizos  
E penas tantu sobradas,  
Sas angustias signaladas  
Chi mi cheren accabare.

## PRIMO GIORNO

*Signora prite ammantades  
Sa cara bianca che nie  
Nade, Signora, pro chie  
Su mantu nieddu portades.*

1. - Pro chie est custu corruttu,  
Pro chi est custu fastizu,  
Bos hat mortu calchi fizu  
O calchi persona e fruttu  
Cussu dolu non est giuttu  
In totas custas edades.

2. - Bos hat mortu po ventura  
Calchi fizu in piccinnia;  
Chi est sa piùs forte agonia  
De un' umana creatura:  
Pro chie est cust' amargura  
Pro chie tantu lastimades.



3. - Alzade Signora mia  
 Unu pagu cussu mantu  
 E nade nos intantu  
 Pro chi est cust' agonia,  
 Chi cun sa cumpagnia  
 Tanta pena alleviades.

4. - Pro chie tantu dolorosa,  
 Pro chie tantu affligida;  
 Pro chie tantu sentida  
 Prite tantu fastizosa?  
 Depet esser preziosa  
 Sa prenda chi suspirades.

5. - Umilmente hos pedimos  
 Chi sa cara nos mostrezit  
 Non ischimos chie sezis  
 Si sa cara non bidimos  
 In su dolu connoschimos  
 Sas bostras penalidades.

6. - A casu Signora mia,  
 Sezis cudda lastimada,  
 Afflitta e sconsolada  
 Sa chi si narat Maria?  
 Como mare de agonia  
 E de contrariedades?

## SECONDO GIORNO

*Isculta populu amadu  
 Proite so posta in corruttu;  
 Pro fizu meu defuntu  
 Porto su mantu attristadu.*

1. - Populu meu elegidu  
 Populu meu istimadu:  
 Prite m' has azzottadu  
 A fizu meu nodidu?  
 Prite l' has iscupidu  
 Prite l' has crucificadu?

2. - Mi preguntas pro su mantu  
 Pritte lu porto attristadu:  
 Tue mi l' has causadu  
 Custu dolu, custu piantu;  
 Responde populu intantu  
 Chi sa morte li has trassadu

3. - Ite male ti hat fattu  
 It' aggravios nd' has connotu?  
 Pro l' accabare in tottu  
 Finz' a lu ider isfattu;  
 Responde populu ingratu:  
 Prite l' has inclavadu?

4. - Pro grandesa e magestade  
 Mi est faltada sa corona,  
 Sende nobile matrona  
 Como porta in soledade;  
 Pro amore e caridade  
 Su coro m' has trapassadu.

5. - Devotos mios benide  
 Cun su coro umiliadu,  
 De dogni culpa e peccadu  
 De coro hos repentide:  
 Suspirade e pianghlide,  
 De custu male operadu.

## TERZO GIORNO

*Sende mortu cun rigores,  
Su fizu de s' anima mia,  
Non mi giamedes Maria,  
Si non Mamma de dolores.*

1. Giamademi s' affligida,  
Giamademi s' attristada,  
Sa de dolos carrigada  
E de penas consumida,  
Ca perdo sa menzus vida  
Pro culpa de peccadores.

2. - O fizu meu istimadu  
Fizu de s' anima mia!  
Fizu de Mamma allegria  
Fizu in su coro portadu!  
Cale morte hat annuadu  
Cuddos tuos risplendores.

3. - O Provvidenzia sagrada!..  
Supplicu pro amore Deu,  
Liberade a fizu meu  
E morza deo inclavada!..  
O prenda mia istamada  
Bendida a prezios minores.

4. - Non mi giamedes Maria  
E nè de grazias pienas,  
Si non de dolos e penas,  
De tormentos e agonia  
Ca bido sa vida mia  
Intregada a traitores.

5. - O devota cunfraria  
De su Divinu Rosariu  
Accudide a su calvari  
Pro accumpagnare Maria,  
Bos det dare su Messia  
Cun larğa manu favores.

## QUARTO GIORNO

*Pro fizu meu ispiradu  
A manos de su rigore  
Sette ispadas de dolore  
Su coro mi hat trapassadu.*

1. - Truncadu porto su coro  
Su pettus tengo frecciadu,  
De cando mi han leadu  
Su meu riccu tesoro,  
Cun tanta furia ch' ignoro  
Comente mi est faltadu.

2. - In brevè ora l' han mortu  
Pustis chi l' han catturadu  
Bindigh' oras est istadu,  
A sa rughe dae s' ortu,  
Rebentadu l' hana mortu,  
Cun sos colpos chi li han dadu.

3. - Iudeos pro amore Deus,  
In custu fatale die,  
Inclavade puru a mie  
A lados de fizu meu,  
Su corpus, inclava, o ebreu  
S' anima già l' has inclavada.

4. - Cumplid' azis su disizu  
De lu ider già defuntu  
Prite in d' unu puntu  
Non bocchides Mamma e fizu ?  
Pro mi dare più fastizu  
Bia m' hazis lassadu.

5. - Già chi est mortu fizu meu  
Accabade como a mie,  
E morza in d' unu die  
Cun cuddu fizu de Deu;  
Crudele e duru Giudeu,  
E canto ses ostinadu.

6. - Morte non mi lessés bia  
Morte non tardes piùs,  
Ca sende mortu Gesùs  
Non podet viver Maria,  
Unu fizu chi tenia  
Sa vida mi l' han leadu.

7. - Benide Anghelos benide  
Cun sos calighes in manu,  
De su samben soberanu  
Sos torrentes accoglide,  
Suspirade e pianghide  
Cust' istragu lastimadu.

## QUINTO GIORNO

1. - Veronica mia amada  
Gasie tengas sa gloria,  
Si est chi tenes memoria  
A Maria s' attristada,  
De sa prenda mia stimada  
Tenes calchi recadu ?

2. - Veronica mia amada  
Cussu non est fizu meu,  
Chi dat a tottus recreu  
Cun sas lughes de sa cara  
Cun bellea tantu rara  
E corpus bene aggiustadu.

3. - Su chi has fattu a fizu meu  
L' aggradesso fiza mia,  
De un' eterna gloria  
Issu ti dat su recreu,  
Deo faghinde su teu  
Mi parto cun coidadu.

1. - Carrigadu de cadenas  
Unu nd' hat passadu inoghe,  
Senz' aliento e senza boghe  
Pro sos tormentos e penas,  
Sa cara de samben piena  
E su corpus insambentadu.

2. - Est sentenziadu a morte  
De s' iniquu presidente,  
Lu connoschet innocente,  
Pilatu intra sa corte  
Accettat sa trista sorte  
Morrer in rughe inclavadu.

3. - Mirade pro disingannu  
Cussa cara insangrentada,  
Cussa est sa ritrattada  
Chi m' hat lassadu in su pannu  
Cussu lizu soberanu  
Chi tant' hazis alabadu.



4. - A Iesu prenda nodida,  
Vida consolu e amore,  
Chi dat forza e vigore  
A dogni anim' affligida,  
Consolu dimandat e vida  
Custu coro angustiadu.

5. - Cale manu, caru fizu  
T' hat coronadu de ispinas,  
Chie sas trempas divinas  
T' annüesit biancu lizu,  
Sas ispinas pro pius fastizu  
Su coro meu han frecciadu.

6. - Fizu meu persighidu  
Fizu meu flagelladu,  
Fizu meu abboffettadu  
Fizu meu consumidu  
Su coru meu affligidu  
Su dolore hat penetradu,

4. In su monte cun feridade  
Su piüs bellu de sos fiores  
In mesu de duos ladrones  
In sa rughe cuntemplade  
E de pustis in soledade  
A su bene ostru amade.

5. - Consolade bos Signora  
In custu duru frangente,  
Su Deus Onnipotente  
Bos aggnidet in cust' ora,  
Già chi niunu condolorat  
Sa pena chi bos han dadu.

## SESTO GIORNO

*Pro chi non cheren dare  
Sepultura a fizu meu,  
Dademi pro amore Deu  
Lemosina a l' interrare.*

1. - Andados si che sun tottus  
Pustis chi l' han inclavadu,  
E medas happe chircadu  
Ma niunu m' hat connottu,  
Non tenzo alcunu devotu  
Chi mi pottat agiudare.

2. - Non sò como piüs Maria  
Si non mamma de dolores,  
Pro cussu sos peccadores  
Non mi trattan cortesia,  
E passan peri sa bia  
Senza mancu salutare.

3. Ando de porta in porta  
Tottus sas domos chirchende;  
Caridade domandende  
Pro custa persona morta,  
Niunu mi dat regorta,  
Ne mi cheren ascoltare.

4. In custu grande fastizu  
In custas penas de fama  
Non riconoschet sa mamma  
Chie non hat connottu su fizu  
Consighind' han su disizu  
De lu bider accabare.

5. Animas devotas mias  
Benide como impare,  
Assistide pro abbassare  
De sa rughe su Messias,  
Cun dobladas allegrias  
Bos lu det ipse pagare.

6. - Fizu meu abandonadu,  
Fizu meu persighidu,  
Como chi t' han destruidu  
Como chi t' han accabadu,  
Niunu si est dignadu  
De lu cherrer sepultare.

7. - Bos pongo in prenda su mantu  
Bos pongo in prenda su coro,  
Pongo in prenda su tesoro,  
Chi est su Spiridu Santu,  
Cun lagrimas e piantu  
Non mi cheren consolare.

## SETTIMO GIORNO

*O triste fatale die  
Oras penosas e duras  
Cagliade bos creaturas  
Lassade piangher a mie.*

1. - A mie tocat su piantu  
A mie su sentimentu,  
Depo' piangher de assentu  
E giugher s' oscuro mantu,  
Ca so affligida tantu.  
Chie ti hat mortu e chie?

2. - A mie tocat su dolu  
Pro chi su mortu est su meu,  
A mie tocat su teu  
A mie su disconsolu,  
Fizu de mamma consolu  
Chie ti hat mortu e chie?

3. - Ioseph de Arimatia  
Dae sa rughe ti slavesit  
E in brazzos ti pongesit  
Coro de s' anima mia,  
Fizu de mamma allegria  
Chie ti hat mortu e chie?

4. - De samben ti han carrigadu  
De piagas ti han circuidu,  
Cun azzottos ti han consumidu  
De ispinas ti han coronadu,  
Fizu meu abboffettadu  
Chie ti hat mortu, e chie?

5. - Cale manu caru Fizu  
T' hat coronad' e ispinas,  
Chie sas trizzas divinas  
T' arranzesit, biancu lizu!  
Nara a mie cun fastizu  
Chie ti hat mortu, e chie?

6. - In breve ora ti han mortu  
De cando ti han catturadu,  
Bindig' oras ses istadu  
A sa rughe dae s' ortu,  
Fizu de mamma confortu  
Chie ti hat mortu, e chie?



7. - A chie mi lassas, Fizu,  
A chie, babbu amorosu,  
A chie, divinu isposu  
In tanta pena e fastizu,  
Cara de biancu lizu,  
Chie ti hat mortu, e chie?

8. - O anghelos de s'altura,  
O Juane e Maddalena,  
Accompagnade cun pena  
Su mortu a sa sepoltura;  
Fizu de mamma tristura,  
Chie ti hat mortu, e chie?

9. - Frades e sorres benide,  
Cun su coru umiliadu.  
De d'ogni culpa e peccadu  
De coro bos repentide,  
Suspirade e pianghide  
De coro pro d'ogni die.

10. - Ite male has operadu  
Fizu a sos peccadores?  
Pro tantos mannos favores  
Custa paga t'han torradu  
Rispondemi coro amadu,  
Chie ti hat mortu, e chie?

11. - Cristianos pro amore è Deu  
In custu fatale die,  
Interrade puru a mie  
A lados de Fizu meu,  
Fizu de mamma recreu  
Chie ti hat mortu e chie?

12. - Morte non mi lesses bia,  
Morte non tardes pius,  
Chi sende mortu Gesùs  
Non podet biver Maria,  
Coro de s'anima mia,  
Chie ti hat mortu e chie?



## Dolores de Maria a pedes de sa Rughe

*Cuntempla coro induradu  
Su lamentu de Maria  
Candu su fizu bidiat  
Subra sa rughe inclavadu.*

1. - Lastimada sola e trista  
De dolores trapassada,  
S'anima tottu elevada  
In sa dolorosa vista,  
Fetesit in terra lista,  
De su chi Jesus hat passadu.

2. - O fizu meu amorosu,  
De su chelu eterna lughe,  
Inclavadu in d'una rughe,  
Pro su mundu maliziosu  
O fizu su piùs ermosu  
Como tottu insambentadu.

3. - O mammas chi fizo hazis  
Appiedade bos de me,  
Chi de sa testa a pec  
Si bene lu cuntemplades,  
Ateru non bi agatades  
Si non dolore sobradu.

4. - Videt a s' amadu fizu  
Postu in colores de morte  
Videt sa celeste corte  
In amargura e fastizu  
Videt su candidu lizu  
Tottu in samben rubricadu.

5. - Videt chi est agonizzande  
Su chi a sos mortos dat vida  
E faghet sa dispedida  
Sa testa a terra inclinande,  
In alta boghe clamande,  
Confessat chi est accabadu.

6. - Passienzia, Reina, ebbia  
In tantu dolu passienzia,  
A Jesus dan sa sentenzia  
Sende sa culpa sa mia;  
Crudele est cust' agonia,  
Dolore est custu sobradu.

7. - Cuntemplade attentamente  
Cunfreres de Santa Rughe,  
E mirade a meuzus lughe  
S' amore tantu fervente,  
Chi Jesus Onnipotente  
Morinde nos' hat mostradu.

## Domenica di Resurrezione « Pasqua »

*Novas de grande allegria  
Certas nos hana contadu  
Chi su Fizu de Maria  
Est oe resuscitadu.*

1. - Su sepulcru si alergesit,  
Sa perda si ch' est oltada  
Sa guardia s' est turbada,  
Su Signore cumpargesit,  
Maddalena lu videsit,  
Perdu l' hat testificadu.

2. - Sos lamentos in cunentos  
S' agonia in allegria  
Sa tristura in melodia  
In gosu sos sentimientos  
E in festivos accentos  
Torret su dolu passadu.

3. - *Resurrexit elevante*  
*Sicut discit sa bandiera,*  
Sa giudaica chimera  
Sos trofeos riportande,  
Morinde e resuscitande  
Hat morte e culpa assuggetadu.

4. - *Regina coeli laetare*  
*Quia cun s' umanu splendore,*  
Raiat oe triunfatore  
*Quem meruisti portare*  
Cuddu de dolore mare  
Tot est in calma torradu.

5. - Si content innos de allegria  
Po su riportadu trofeu;  
Bonas Pascas nos det Deu  
Ca bintu hat su Messia,  
E sa mortale agonia  
In gloria hat cambiadu...

## Ottava di Pasqua

*Oe cun rara armonia  
In coro si dèt cantare :  
Regina coeli laetare  
Alleluia e allegria.*

1. - Bella reina de s'altura,  
De triunfos coronada  
Siat oe abbandonada  
Sa pena e sa tristura,  
Oe donzi creatura  
Cantat cun melodia.

2. - Sa dominiga menzanu,  
*Resurrexit sicut discit;*  
Maddalena lu vidisit  
In figura de ortolanu,  
Cun sa bandera in manu  
Faghinde a sos santos ghia.

3. - Cuddu Deus chi cun sa morte  
Sa morte hat post' in ruina,  
Pro nois prega, Reina,  
Dade nos felice sorte,  
A s' inferru pena forte,  
Affannu e tribulia.

4. - Custa Pasca nos hat dadu  
Vida eterna, eternu risu,  
Cust' esiliu in paradisu  
Deus amante hat cambiadu;  
Resurgende nos hat nadu  
A li fagher cumpagnia.





## ATTU DE CUNTRIZIONE

Perdonu Deus meu  
Cunfesso: happe peccadu,  
Cuntritu e umiliadu  
Pedo piedade.

Eterna bonidade,  
Soberana clemenzia,  
A sa bostra presenzia  
Sa culpa aburro.

Umile a sos pes curro,  
Miseru peccadore,  
Cum sinzeru dolore,  
e pianghende.

So inculpadu nende  
Meda hos happe offestu,  
Lu tenzo a grande pesu,  
o Deus Meu.

De milli culpas teu  
Cunoscio chi happe erradu,  
E tantu t'altreatadu  
Su Signore.

Chi sezis Salvatore,  
Misericordiosu,  
Mi dades, amerosu,  
S'isperanzia.

E tenzo cunfidanzia  
Chi senza m'appartare  
Mi dezis perdonare  
Interamente.

Protesto in su presente  
Lassare s'antigu usu:  
De non peccare piusu  
Fo proponzo.

A custos pes mi ponzo,  
Cale prodigu fizu,  
Finas chi su disizu  
Happo a lograre.

Ispetto, perdonare  
Che a sa Madalena  
Mi dezis, et a sa pena  
Mi preparo.

Indignu mi declaro  
De tenner su perdonu,  
Ma hois, Deus bonu  
Mi lu dades.

Chi gratia et chelu dades,  
pustis fatta cumplida  
Sa pena giusta, devida  
A su peccadu.

Dev'esser riscittadu  
In ogni operazione,  
Da ogni occasione  
Happo a fuire.

Devo semper sighire  
Sa bostra Santa Legge,  
No cale via erezze  
E senza timu

Gesù Fizu Divinu,  
So ruitu, m'assistide,  
Dade sa manu, benide  
A mi nde alzare.

Su Samben applicade  
Chi hazis derramadu,  
Chi pro mene hazis dadu  
Ind'una Rughe.

Siat Maria lughe,  
Piedade e potenzia,  
A sa Bostra presenzia  
A m'assistire.

Cherzan exaudire  
Cun Anzelos e Santos,  
Et cantos regnant, cantos  
In sa gloria. Amen.